



Errenteriako Udala



Lezoko Unibertsitateko Udala



Pasaiaiko Udala



OIARTZUNGO
UDALA

ADIERAZPEN INSTITUZIONALA

Martxoaren 8a hurbiltzen ari zaigu urtero bezala, Emakumeon Eguna. Urtetako borroka gogoratzeko eta ospatzeko aukera ematen digu, baina batez ere, emakumeon egoeraren inguruko hausnarketak partekatu eta balantzea egiteko aukera ona da.

Krisiaren itzalpean harro dabilta kapitala eta patriarkatua, mozorroa kenduta. Emakumeok orain arte lortutako askatasun eta eskubideak galtzen ari gara, atzeraka goaz. Inboluzio-une batean gaude. Historia lineala ez denez, ez goaz beti aurrera; baina historia idatzita ez dagoenez, ezer ez da aldaezina. Gure esku dago borroka feminista indartu eta, haizea alde ez izan arren, egoera aldatzea. Emakumeon egungo egoera hitz gutxitan laburbildu beharko bagenu, honela jasoko genuke: lan-merkatuan gero eta biluziago, zaintzaren motxil gero eta kargatuago, umetokian bandera espainola ezarrita (Estatuaren lurralde bihurtuta) eta gorputza indarkeria sexistak moretuta. Hori guztia, familia-eredu heterosexualaren hautua egiten ez dutenen kontrako eraso ideologikoarekin: gaiztoak, gaixoak, sorginak eta eroak omen.

Lan-merkatuan gero eta biluziago gaude emakumeok. Botere ekonomikoaren mesedetan arautzen ari dira lan-mundua, lanerako gorputza, burua eta eskuak besterik ez ditugunok babesik gabe utziz. Haurdun dauden emakumeak kaleratzeko aukera legeztatu da, lan-baldintzak okertzen ari dira orokorrean eta emakumeak nagusi diren hirugarren sektorean bereziki, eta sektore feminizatueta behin-behinekotasuna, ziurgabetasuna eta prekarietatea dira nagusi.

Horrekin batera, lan-merkatutik kanpo uzten ditugun etxeko lanak eta zaintza-lanak emakumeen gain jarraitzen dute. Ez hori bakarrik; pertsonen zaintza luxua dela baloratuta, horretarako dauden zerbitzuak eta laguntzak murrizten ari dira eta, ordainetan, emakumeon motxilak kargatzen.

Gure gorputza ere ez digute guretzat utzi nahi. Gure gorputza gurea dela ukatu nahi digute. Gure umetokia Estatu-arazoa dela diote, baina gaude beraientzat arazoa emakumeak garela. Abortatzeko eskubidea ukatzeko Espainiako Gobernuak aurkeztu duen kontraerreformarekin, duela 40 urte oihukatutako aldarriak berriz etorri zaizkigu umetokitik eztarrira. Posible da lan-merkatuak ume gehiago nahi izatea langabezia-poltsak handitzeko, langabeziaren mehatxupearan langileak otzantzeko, beldurra areagotzeko. Baina, batez ere, motibazio ideologiko ultrari erantzuten dio; emakumeok ama-emazte izan behar dugun ideologiari, hain zuzen.

Abortuaren kontraerreformarekin batera, emakumeon askatasunaren eta aniztasunaren kontrako eraso gehiago datoz, emakumea emazte-ama fin, otzan eta menpeko bihurtzeko. Patriarkatuaren zutabea den familia-eredu tradizionala eta heteropatriarkala indartzeko neurriak dira. Ugalketa lagundurako eskubidea bikote heterosexualentzako soilik; haurdun geratzen diren emakume oro haurra izatera behartu; norberaren gorputza eta desioak ezagutu eta garatzeko hezkuntza afektibo-sexuala murriztu edo LOMCErekin guztiz ezabatu; elizgizon esanguratsuen ahotik sexu bereko pertsonen arteko harremanak gaixotasun gisa aurkeztu dizkigute eta indarkeria sexistaren dimentsioa ezkutatu, garrantzia kenduz, datuak makilatuz (indarkeria sexista gisa kontabilizatuko direlako soilik eraildako emakumeak eta 24 ordutik gora ospitaleratuak) eta batzuetan justifikatuz. Erakunde publikoek eta hedabideek horretan duten ardura ez da txikia.

Emakume eta gizon askeak, buru- eta gorputz-jabeak izateko heziketa zeinen garrantzitsua den ondo dakitenez, LOMCErekin hezkidetzaren bidean egindako lana ezabatu nahi du Espainiako Gobernuak. Berdintasunaren eta hezkidetzaren alde egindako lana alde batera utzi eta erlijio katolikoa jarri nahi dute erdigunean.

Hedabideetan ere atzerakada garrantzitsua atzematen dugu eta bereziki larria iruditzen zaigu hedabide publikoetan gertatzen ari dena. Aktualitateko arazoenguruko eztabaida eta tertuliatan emakumeon presentzia anekdotikoa da. Ez dugu ahotsik. Ikusezinak gara. Horretaz gain, hedabideetako edukiek eta

publizitateak estereotipo, rol eta balio sexistak elikatzen eta indartzen dituzte. Esan dezakegu hedabideak estereotipoen habia direla.

Egoerak alarma guztiak piztera garamatza. Feministok urteetan aldarrikatutako eta borrokatutako helmuga gero eta urrunago dag: Emakumeok subjektu politiko gisa, eskubide osoko herritar gisa onartzetik gero eta urrunago gaude. Egungo krisia emakumeon askatasunen eta berdintasunaren krisia ere bada. Ez orain arte helburuok lortu genituelako, baina bai atzerapauso nabarmenak ematen ari garelako.

Ez da halabeharra, ordea; botere politikoek eta ekonomikoek norabide horretan eraman nahi gaituzte.

Egoera gordinak etsipenean erortzeko baino, egoeraz jabetu eta erantzuna pizteko balio izatea nahiko genuke. Betaurreko eta lupa moreak jantzi, elkarri eskua eman, atzerapausoak identifikatu eta hauei aurre egiteko prestatu behar dugu. Gure bidea egin, guk nahi duguna izateko. Jos ditzagun emakumeon arteko sare sendoak. Eta zabal dezagun sarea eta lana esparru guztietan: sozio-ekonomikoan, kultur arloan, politikoan, erakundeetan...

2014ko martxoaren 8aren harira, Errenteria, Lezo, Oiartzun eta Pasaiako Udalok Euskal Herri feministaren helburua gure egin eta borroka feminista indartzeko konpromisoa adierazten dugu. Gure zeregina da mugimendu feministarekin batera orain arteko borroken lekukoa hartu eta eustea; gure zeregina da erdi lo genituen borrokak berpiztea -lortuzat genituen eskubideak uste baino errazago gal ditzakegulako- eta gure zeregina da mugimendu feministak irekitzen duen bidea jarraitzea, orpoz orpo. Emakume eta gizon askeen Euskal Herria helburu, bide horretan lan egingo dugu erakunde publikoetan, elkarteetan, komunikabideetan eta kalean.

Jakitun gara jendartea eraldatzeak gure buruak ere eraldatzea esan nahi duela eta jakitun gara barne-mailan gauza asko ditugula oraindik lantzeko. Ez gara jendartetik isolatutako erakundeak eta, ikasi eta landu beharreko alderdi asko ditugu oraindik. Kanpora begira egingo dugun lanaz gain, etxe barruan ere eraldaketa feministaren bidean lan egiteko konpromisoa hartzen dugu.

Oiartzunen, 14/03/06an

